



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : f Tir Yimiyim

Instagram tiryimiyim@aolima

YouTube tir yimiyim

TAPAK 8

Nütsüng teimtiba aliba linük akümba
ya sorkar tamakok lir: Akhilesh

Nadal Madrid Open nunga
shilem magitetsü



VOL. XX NO. 188 (ADOK 188) DIMAPUR ROGONÜ (FRIDAY)

RONGCHII (APRIL) 21, 2023

₹ 5.00

ULB election atema sorkari mapang tali nungdaker: Minister Imna Along

Kohima, Rongchii/April 20 (TYO): State nung Urban Local Bodies indang elections dak sendakba nung telemtetba ka agitsü atema Nagaland sorkari mapang tali nungdaker, ta Nagaland minister aser state BJP tir, Temjen Imna Along-i ashi.

State sorkari urban local bodies atema telemtetba agiba nung teti ajak dendaktsüner, saka asenoki sobaliba aser yimsü-yimbong metettsüla, kong Hoho aser lokti tentet balala lir, ta Minister, Higher Education & Tourism, Temjen Imna Along-i ashi.

"Naga nung sobaliba agi melaba ama urban local bodies asangsang akumtsü asoshi civil society aser NGOs tem den jembishinütsü atema sorkari mapang tali nungdaker," ta pai ashi.

Urban local bodies elections dak sendakba nung tawa Supreme Court ajanga Nagaland sorkar nem osang ka agüja lir.

Nagaland Legislative Assembly nung March 29, 2023 nü Nagaland Municipal Act 2001 ya agienba yong May ita agitsü sentong aliba municipal elections athi.

Nagaland nung mashisa tetsür shilem 50 dang ANC atema aor

Kohima, Rongchii/April 20 (TYO): Nagaland nung mashisa tetsür shilem 50 dang early Antenatal Care (ANC) atema mezüing ita asem nung aor aser shilem 21-i dang ANC check-ups pezü tembanger, ta Dr Longri Kichu, UNICEF ajanga Kohima nung Bresthostibarnü First 1000 Days sayaba mapang metetdaksü.

ANC ya mashisa mapang tetsür asoshi systemic care lir, aser iba ya tetsü aser tepok nung aliba tanur temang anema alitsü aser tepok nung tanur ainba asadangtsü asoshi lir, ta pai ashi.

Nagaland nung aliba tanur shilem 58 dang vaccine ajunga agir lir, tanur shilem 46 dang mozü ki nung asor, ita trok dang mama yongdaksüba tanur shilem 43 aser tanur shilem 43 dak Anemia lir, ta pai ashi.

Iba atema First 1000 Days mapang ita toku (anogo 270) mashisa mapang, Infancy period kum 0-1 (anogo 365) aser toddler period kum 1-2 (anogo 365) nung rangloksü aser ajakji senteper mezüing anogo 1000 ajunger, ta pai ashi.

Mashisa mapang mashisa kumer ita asem tsüingta mezüing ANC check-up nung tajemba agi check-ups pezü nung rangloka Iron Folic Acid aser Calcium supplements agütsütsü aser mozü kidang tanur asoba nung rangloksü.

Infancy period nung tanur sorghonda ka tsüingta mamatzü agütsüdaksü tenzükba, ita trok tashi mamatzü kisüing agütsüba, mapang shidak nung vaccine agütsüba nung rangloksü, ta pai ashi.

Toddler period nung tanur nem ita trok nungi kum ana tashi mamatzü den danga chiyongtsü agütsütsü aser asaya aser kazütsü balala ajanga angazükdaksütsü, ta ashi.

Pai ashiba agi, First 1000 Day atema sorkar scheme balala lir aser item rongnung sorkar mozüki nung angati ANC tendangba den angati Iron Folic Acid, Calcium, Janani Shishu Suraksha Karyakaram (JSSK), Janani Suraksha Yojana (JSY)

Chief Minister Health Insurance Scheme-ia empanelled facilities nung tanur normal deliveries, Caesarean deliveries aser kinü tanur anepaluba nung insurance agütsür, ta pai ashi.

Social Welfare Department ajanga mashisa aser tanur nem chiyongtsü agütsür, first live birth atema Pradhan Mantri Matru Vandana Yojana (PMMVY) Scheme kübok senotsü teyari agütsür.

PMMVY kübok tetsür ka nem Direct Benefit Transfer yimya nung teyari sen 5000 agütsür. Iba sentong ya January 1, 2017 nungi mapa kuma inyaker aser Nagaland nunga iba teyarir agitsü nisung 34,754 tenüing zülüoka lir aser March 27, 2023 tashinung sen crore 15.35 dak tema lema agütsüogo.

Iba First 1000 days sentong sayaba mapang Dr Supongmeren, Gynaecologist, District Hospital Mokochung ajanga 'Importance of ANC and delivery at hospital' onük nung ajemdaker jemi, Dr Ruutuo-u Sorhie, Consultant Paediatrician NHAK ajanga 'Breastfeeding: The complete nutrition & early childhood development' onük nung jemi, Dr Sheila Longkume, SMO WHO ajanga 'Importance of vaccination in children' indang jemi, Dr Khelito Zhimomi, State Program Officer, Reproductive Child Health (RCH) ajanga 'Village Health Sanitation and Nutrition Day' indang jemi aser ano Department of Social Welfare aser Nagaland State Rural Livelihood Mission (NSRLM) Rural Development ketdangsur temia nubentsüa aliba tetsü aser kinü tanur atema sorkar scheme balala agütsüba indang lemsatepa liasü.

NHM kübok First 1000 Days Intervention sayaogo



H&FW, Minister, P. Paiwang Konyak den tongti ketdangsertem den "First 1000 Days of Intervention" sayaba sentong nung nung tangokba noksa nung angur.

Dimapur, Rongchii/April 20 (TYO): National Health Mission kübok First 1000 Days of Intervention sayaba sentong ka Hotel De Oriental Grand, Kohima nung April 20, 2023 nü agia liasü, kong tesemdangertongti Minister, Health and Family Welfare, P. Paiwang Konyak aser tetushi tesemdangertongti Commissioner and Secretary, DoHFW, Y. Kikheto Sema, IAS liasü.

Iba sentong nung jembidang P. Paiwang-i Antenatal Care aser mozü kidang tanur asoba, Nutritional support, Breast feeding aser vaccine agütsüba nung temolung agütsütsü indang jembia liasü.

Tsürabor aser kibong ka ama asenoki tanur ka takum anogo 1000 indang junga meteta tanur

tarutsü jenjang asoshi iba shisatsü amshitsüla, kechiaser iba mapang tanur temang, tekolok aser shisatsü nung ainer, ta pai ashi.

Iba shisatsü yagi tanur junga anitetba tsütsü tsürabor nem shisatsü agütsütsü, koba ajanga tanur temi bilemba aser tekolok ainba nung yarir aser tajungtiba nung inteter, ta pai ashi.

Antenatal Care, mozüki nung tanur asoba, mapang shidak nung mozü agütsüba amala service tem health facility center tem nung angur aser ano village health and nutrition days nunga angutsü, anungji tsürabor temi iba service nungi tajangzük agitsüla, ta ashi.

Pai CMO-i anir District Health ketdangsur ajak dang iba mapa asoshi bendanga agütsür inyaktüsü

asor Nagaland nung tatembangba yimtsüing tashinung iba service agütsütsü ajungshia liasü.

Mozüki nung takotet health ketdangsur anepalua tanur asotsü aser asü-amaba ajemtsü asoshi tetsü aser tanur kumzükä ayutsü atema Medical department ajanga Mon aser Kiphire district nung "Birth Waiting Home" indang pilot project tenzükä lir, ta pai ashi.

Kohima, Dimapur aser Mokochung nung aliba blood bank asem nung mapang ajak nung azü alitsüla. Iba asoshi blood donation awareness campaign akatsüla aser nübur temia arua azü tenlaba ajanga nisung takum aika kumzüktsü Minister Paiwang-i ayongzükä liasü.

(Maneni tapak 2 nung...)

India nung tanur nem vaccine agütsüba timba kumogo: UNICEF

New Delhi, Rongchii/April 20 (Agencies): Bresthostibarnü UNICEF India ajanga 'The State of the World's Children 2023: For Every Child, Vaccination' report sayaa liasü, kong tanur asüding mozü agütsüba tajangzük indang jangja shia lir.

The Vaccine Confidence Project (London School of Hygiene and Tropical Medicine) ajanga data bendena UNICEF ajanga adoktsüba report nung, linük 55 asadanga nungi China, India aser Mexico linüktem nung dang tanur asoshi vaccine agütsüba nung temolung agütsüba mesüra tajungba akumba sayur.

Linük 55 asadanga nungi shilem asem aser tatishitsü agi Pandemic tenzükba sülen Republic of Korea, Papua New Guinea, Ghana, Senegal aser Japan amala linüktem nung vaccine dak tamang akaba ajema akumba bushitet.

Osang tiaüz angazükba aser

vaccine agi mapa inyakba nung tamang makai akumba mechi vaccine agitsü nungnangba tali akumer, ta report ajanga ashi.

Küm 30 tsüingta childhood immunization tsütsü atsüingzükä aoba mapang COVID-19 pandemic ajanga animesoa alima nung vaccine dak tamang akaba ajema akumer.

Pandemic ajanga tesem ajaklen amai childhood vaccination nung timtem agütsü, talisa health system tali akhangba, immunization resources tem COVID-19 vaccination dangi melenba, health worker agi anüingba aser kidang alitsü mera agütsüba ajanga tanur nem mozü agütsüba aser agiba nung ajema akum.

"The State of the World's Children 2023" report nung alima nung vaccine dak tamang tulutiba akaba linüktem rongnung India ya ka lir ta sayur.

"Ibai Government of India indang yimten aser lokti tentet

temi temolung agütsüba ajanga lir aser pandemic mapang vaccines drive sashia ayongzükä agiba ajanga tamang katetba nung yari aser tanur ajak nem mapang shia mozü agütsüba inyakyim nung tashi itshi," ta Cynthia McCaffrey, UNICEF India Representative ajanga ashi.

"Immunization ya meimchir asoshi tongtipang takok rongnung ka lir, aser ibaji ajanga tanurtem anema alir aser lokti nung shilem agir. Tatemsaba tanur nem mozü agütsüba ajanga tanur kisüing masü saka yangji aliba nübur ajanga ajangzükä," ta ashi.

Mapang shidak nung tanur nem mozü agütsüba aser health system tashi ita ayuba ajanga tarutsü nung tashidak wara nungi tajungtiba kumzükä ayutsü aser asü-amaba ajemtsü," ta ashi.

2019 aser 2021 tsüingta tanur million 67 nem vaccine magütsü aser linük 112 nung vaccination coverage level ajem, ta report ajanga ashi.

Assam-Arunachal Pradesh arütsü ken o bentettsü MoU zülutep



Union Home Minister Amit Shah (tiyong), Assam Chief Minister Dr Himanta Biswa Sarma(abelen) aser Arunachal Pradesh Chief Minister Pema Khandu (achiji) nungertem noksa nung angur.

New Delhi, Rongchii/April 20 (Agencies):

Assam aser Arunachal Pradesh tsüngta arütsü tsütsü mangatetep mapang talangka nungi aliba state ana tsüngta Memorandum of Understanding (MoU) ka New Delhi nung Brestibarnü zülutepa tembangogo, kong Union Home Minister Amit Shah, Assam Chief Minister Dr Himanta Biswa Sarma aser Arunachal Pradesh Chief Minister Pema Khandu nungertem dena liasü.

State ana tsüngta mapang talangka nungi arütsü ken o mebenteti aliba angateteptsü asoshi Assam sorkar aser Arunachal Pradesh sorkar tsüngta MoU ya North Block nung aliba Ministry of Home Affairs (MHA) nung zülutepa liasü.

Arütsü ken o angateteptsü asoshi tezüngzüktep agiba nung Sarma aser Khandu nati meyongnem agüja liasü.

Iba sentong nung jembidang Union Home Minister, Amit Shah-i ashiba agi, Assam aser Arunachal Pradesh tsüngta mapang talangka nungi mangatetepi aruba arütsü ken o tajungtiba nung angateteptsü asoshi ibai kodanga mamashiba anogo ka lir.

Arütsü ken o angatetepba ajanga Northeast nung ajaklen terenlok aser yimjung alitsü

teimla lir, ta Shah-i ashi.

Linük nüjiso ngur küm 75 ajungba benjongdang kilometre 800 talang inter-state arütsü nung anatsülen mangatetep aliba yimtsüng 123 indang ken o teti asoshi tembangogo, ta Union Home Minister-i ashi.

MoU zülutepba ya otsüsütsü mapa ka lir aser tesunep aser yimchiyimjung tetenzüker asütsü, ta Assam CM-i ashi.

Arunachal Pradesh Chief Minister Khandu-i iba sentong nung jembidang, Assam aser Arunachal Pradesh tsüngta arütsü ken o angatetepba ya tarutsü asoshi kanga tongtipang lir aser iba ya ajanga tesunep aser terenlok tsütsü temelenshi tulu arutsü imlar, ta ashi.

Iba MoU zülutepba sentong nung Union Minister Kiren Rijiju, Assam ministers Atul Bora, Jayanta Malla Baruah, Keshab Mahanta, Bimal Borah aser Sanjay Kishan, Chief Secretary Paban Kumar Borthakur aser ketdangsurtem dena liasü.

Küm aika Arunachal Pradesh den arütsü ken o bentettsü asoshi state sorkari tentetba 12 Regional Committees ajanga benokba ken o Assam cabinet-i Bodhbarnü agizüka liasü.

Dispur nung Chief Minister Dr Himanta Biswa Sarma lenisüba kübok Cabinet senden ka amendang telemteba ya agi.

Assam aser Arunachal Pradesh tsüngta arütsü kilometre 800 dang tera agi talangba lir.

Iba arütsü ken o jembitsü atema Assam Chief Minister Sarma aser Arunachal Pradesh Chief Minister Khandu tsüngta senden aiben mena liasü.

Taoba küm July ita state anaprongi Namsai Declaration nung meyongnem agüja liasü, kong mangatetep aliba yimtsüng 123 nungi 86 kumdaktsütsü molungtep aser cabinet minister tekolakba sür committee 12 tenteta mangatetep aliba tesemtem semdangtsü, yangji alirtem bilemba bendena pei-pe sorkar nem osang agütsütsü renem.

Government of Assam aser Government of Meghalaya tsüngta 2022 küm March ita linük yimtiba nung küm 50 tashi mebenteti aruba arütsü ken o bentettsü asoshi agreement ka zülutepa liasü.

State anapronng nungi chief minister ajanga draft resolution ka MHA ajanga asadangtsü asoshi Union Home Minister Amit Shah nem January 31 nü agütsür ita ana lir iba agreement ya zülutepa liasü.

State ana tsüngta tesem 12 nung mangatetep aliba nungi tesem trok nung angateteptsü asoshi Assam aser Meghalaya sorkari pangzük ka renema liasü.

DC Kohima ajanga mozü kumdanga ayoktsü metetdaksür

Dimapur, Rongchii/April 20 (TYO):

Deputy Commissioner, Kohima, Shanavas C, IAS ajanga sangdong ka nung, Drugs and Cosmetics Act 1940 & Drugs & Cosmetic Rules 1945 indang Rule 65 nung shia aliba ama Kohima district telungzük nung aliba Pharmacies/Medical Stores ajak dang tsünglanglen totuyuba agüja aliba sülen shidak anidaktsü metetdaksüogö.

Schedule 'X' & 'H' kübok shia aliba mozü tem ya Registered Medical Practitioner ajanga agitsü ashiba ama

ayoktsüla.

Item mozü ayokba ya register balaka nung bendentsüla, kong prescriber tenüng aser address, shiranger aser mozü, mozü kwi ayok aser iba amala record balaka ayutsüla.

Scheduel 'X' aser 'H' mozü ayokba Pharmacies/ Medical Stores ajak nung telung aser temalen CCTV camera tem iba osang sangdongba anogo nungi ita ka tsüngta inoktsüla aser aser footage recording aser storage atema data tajemba agi ita ana

asütsüla.

Pharmacies/ Medical Stores temi anepalua aliba CCTV camera tem nung tangoka aliba footage aser register tem District Drug Controller Authority/District Enforcement Force, Kohima ajanga repringtsü aser ita shia Deputy Commissioner, Kohima nem report agütsütsü.

Pharmacies/ Medical Stores temi iba totuyuba nung manidakra ozüng agi melaba ama tapet temerenshi alitsü, ta sangdong ajanga ashi.

Private Hindi Institute ajak dang metetdaksür

Dimapur, Rongchii/April 20 (TYO):

Department of School Education ajanga Nagaland nung Private Hindi Institutes ajanga indang Proprietors/ Heads tem dang sangdong ka nung, April 25, 2023 nikonngang 2:00 ako nung Directorate of School Education, Kohima indang Morung Hall nung senden ka amentsü, ta metetdaksü.

Iba senden nung Private

Hindi Institutes ajanga Government of Nagaland den affiliate asütsü, Private Hindi Institutes tem amenoktsü aser temzüng-ozüng yanglutsü, Degree aser Courses, Institutes nung class agiba yimyatem indang kembitsü.

Anungji iba senden nung Private Hindi Institutes indang Proprietors/Heads tem medema arua adentsü ayongzükter, ta sangdong ajanga ashi.

Emergency mapang tepuokdak ayur nem Assam-i ita shia sen 15,000 agütsütsü

Guwahati, Rongchii/April 20 (Agencies):

Emergency mapang tepuokdak ayuba nisung 300 dak tema nem Assam sorkari ita shia pension sen 15,000 agütsütsü telemteba agiogo.

Bodhbarnü cabinet senden ka nung state sorkari parnok nem pension agütsütsü telemteba agi, ta Assam Housing and Urban Affairs Minister, Ashok Singhal-i ashi.

Emergency mapang tepuokdak ayurtem ya Assam sorkari 'Lok Tantra Senani' ama züngshir, ta pai ashi.

"Democracy asoshi parnoki shilem agiba metetdakja tanü

Assam Cabinet-i nisung 301 nem ita shia pension agütsütsü agizükogö. Parnoki ita shia sen 15,000 angutsü. Nisungbaji sür lira, pa kinungtsü nem agütsütsü, aser tenapronng sür lira, kibong makum aliba jala nem agütsütsü," ta Singhal-i osangbener dang Bodhbarnü ashi.

India nung state aika nung Emergency mapang tepuokdak ayur nem pension agütsür, saka Assam sorkari agütsütsü sen ya timtiba lir, ta pai ashi.

Emergency ya iba mapang ato kilonser inyaka alila Indira Gandhi-i ita 21 atema 1975 nungi 1977 tashi benoka liasü.



Kelingmen yimtak 20 April 2023 anogo church & Mission ajanga Impur christian hospital pallativ care nungi Doctor Aka aser Doctor Abigail den nurses aser Chaplin Narola walling aruaki Palliative case 17 den nisung 52 tashi temang tendanga mozu aguja semdangba asoshi sannuker Mr Jongshimanen Lkr Pastor ajanga pelaba lemsatepba liasü

NHM kübok First 1000 ...

(TAPAK 1 NUNGI...)

Tarutsü jenjang ajungtsü atema asen chirnur nem First 1000 Days mapang akok tashi yaritsü ochishia inyakti, ta paisa ayongzük.

Tanur ka tekolok shisatsü aser temang terenlok asoshi mezüng anogo 1000 ya tongtipangtiba mapang lir, ta Y. Kikheto Sema-i ashi.

Iba mapang tanur ka tarutsü asoshi tamendak dak yanger, iba mapang tekolok shilem 80 ainer, Optimum Health asoshi tamendak dak, arishi tepiyong tekolok shisatsü renlokba mezüng anogo 1000 nung keta lir aser tanur ka tarutsü yangertsü maongka tulu lir, ta pai ashi.

Mezüng anogo 1000 nung tongtipang teinyaktsüji Quality Ante-natal care, Hospital delivery, Breast feeding, Full vaccination, tanur aser tetsü atema chiyongtsü tajung aser Early Childhood development alitsü, ta pai ashi.

Linük nung ANC, institutional delivery aser vaccination tsütsü Nagaland ya jenjang tajemtiba nung lir, aser item ya talisa akhi mapang nungi amanga jembiba, ANC check-up aser

Geographical barriers - facility meta talang nung aliba aser lenmang majungbatem lir, ta pai ashi.

Iba sentong nung Dr. Longri Kichu, UNICEF ajanga First 1000 Days indang rateta ashi, Dr. Supongmeren, Gynaecologist DH Mokokchung ajanga antenatal care aser mozü kidang tanur sodaktsütsü indang onüktem nung ajemdaker jembia liasü.

Department of Social Welfare ajanga mezüng anogo 1000 mapang PMMVY Scheme & Nutritional support agütsüba indang presentation ka agütsü, Dr. Ruutuo-u Sorhie, Consultant Pediatrician NHAK ajanga 'Breast feeding: the complete nutrition & early childhood development' onük nung jembia liasü.

Dr. Sheila Longkumer ajanga tanur nem vaccine agütsütsü indang jembi, NSRLM ajanga SHG temi SBCC agütsüba indang presentation ka agütsü aser Dr. Khelito Zhimomi, SPO, RCH ajanga village health sanitation aser nutrition day indang jembia liasü.



April 20, 2023 nü New Delhi nung Global Buddhist Summit 2023 tenzüksü lia Buddhist putirtem tangokba noksa nung angur.

Naroda Gam ken o nung tai tonglokja alir ajak court-i maitsür

New Delhi, Rongchii/April 20 (Agencies): Brihostibarnü Ahmedabad nung aliba special court kati 2002 küm Gujarat nung rara tulu adokba mapang Naroda Gam nung Muslim nung 11 tepsetba ken o nung tai tonglokja alir ajak maitsü. Tai tonglokja alirtem rongnungji taoba mapang BJP MLA, Maya Kodnani aser taoba mapang Bajrang Dal lenir, Babu Bajrangji nata densema lir. Iba ken o nung tai tonglokja alir ajak senteper nisung 86 liasü, ajsüüaka iba ken o angadanga aruba mapang nung parnok 18 bo süadokogo.

Arrla 302 (nisung tepsetba), Arrla 307 (tepssetsü merangba), 143 (ozüing alema nisung adenshiba), 147 (rara adokdaksüba), 148 (raraba hadir balala amshiba), 120 (B) (ozüing alema inyaksü asalentong yangluba) aser Arrla 153 (rara ajungshiba) arrlatem nung ajemdaker parnok anema ken o benoka liasü. Item arrla nung aibelenba atema temerenshi tulutibaji tasüba temerenshi lir. Special Investigation Agency (SIT) atema special judge, S K Baxi-ia tai tonglokja alir 68 anema obendang agütsütsü. 2002 küm February 28 nü Ahmedabad yimti kübok Naroda Gam area nung Muslim nung 11 tepseta liasü. Godhra train nung passenger 58 rongseta südaksüba anema longkak aitba anogo nung Muslim nung 11 ji tepset.

Maya Kodnani atema kuli agüja liasü. Arrshi küm 67 Kodnani-i court dang, Naroda Gam nung nisung tepsetba mapang nungji labo Gujarat Assembly nung liasü iba sülen Sola Civil Hospital-i ao, ta kuli agütsüdaksütsü atema Amit Shah jaoka liasü. Iba ken o angadang tenzükba mapang nung presiding judge ji S H Vora liasü aser pa Gujarat High Court-i aoba sülen Jyotsna Yagnik, K K Bhatt aser P B Desai nungera presiding judge inyaka aruogo. Iba sülen Special judge M K Dave aru saka transfer asü. Kodnani ya Gujarat nung Narendra Modi-i aniba sorkar nung minister liasü. Naroda Patiya ken o nung lai aitsüba sülen küm 28 tepuokdak ayutsü obendang agütsü saka Gujarat High Court-i iba ken oji agien. Naroda Patiya nunga nisung 97 tepseta liasü.

Arrla 302 (nisung tepsetba), Arrla 307 (tepssetsü merangba), 143 (ozüing alema nisung adenshiba), 147 (rara adokdaksüba), 148 (raraba hadir balala amshiba), 120 (B) (ozüing alema inyaksü asalentong yangluba) aser Arrla 153 (rara ajungshiba) arrlatem

2010 küm nungi tenzüka court nung küm 13 jungnüa iba ken o angadanga aruogo; iba mapang nungji judge trok melentepa item ken o angadanga aru. 2017 küm September ita nung BJP lenir (tangbo Union home minister) Amit Shah-i

Kodnani ya Gujarat nung Narendra Modi-i aniba sorkar nung minister liasü. Naroda Patiya ken o nung lai aitsüba sülen küm 28 tepuokdak ayutsü obendang agütsü saka Gujarat High Court-i iba ken oji agien. Naroda Patiya nunga nisung 97 tepseta liasü.

Nütsüing teimtiba aliba linük akümba ya sorkar tamakok lir: Akhilesh

New Delhi, April 20 (Agencies): Alima nung nütsüing teimtiba aliba linükji India kümogo, ta UN-i sangdongba sülen anogo ka lir Brihostibarnü taoba mapang Uttar Pradesh Chief Minister aser Samajwadi Party Tir, Akhilesh Yadav-i, iba ya sorkar tamakok lir, ta aitsü. Akhilesh Yadav-i Hindi oshi agi twitter ajanga, "Shisabulutsü osang: India nung nütsüing teimtiba. Kuliji: sorkar

tamakok," ta metetdaksü. Paisa, sensak tia aser mapa manguba den külemi mapa nung yariteptsü aser kibong nungita yaridaksütsü atema nisungtemi tanur teimba aginü, ta ashi. Paisa, medical agi anüingba agi nisungtemi tanur kinü asüadang süadoktsü ta tsübu, iba denji külemi sorkari tanur nokdangba 'contraceptives' peria magütsütet, ta ashi. Shisaliok agi anüingba ajanga

nütsüing tali arenba timtem mangateti liasü, aser item kuli ajanga linük nung nütsüing tali aren, ta paisa shisem. UN data ajanga, India nung nütsüing crore 142.86 lir, aser ibaji alima nung nütsüing teimtiba lir, ta metetdakja liasü. 2050 küm tashi nungbo India nung nütsüing 166.8 ajungtsüa akok aser iba kümji China nung nütsüingbo crore 131.7 dang asütsü, ta asadangtetogo.



April 20, 2023 nü West Burdwan district nung aliba Arjan Singh Air Force Station nung India aser US air force sepaitem joint exercise agidang tangokba noksa nung angur.

India nung ayongzükba SCO senden nung Pak foreign minister adentsü

New Delhi, Rongchii/April 20 (Agencies): India nung ayongzükba Shanghai Cooperation Organization (SCO) senden nung adentsü atema Pakistan foreign minister, Bilawal Bhutto Zardari-a India-i arutsü.

arudar; iba ama tensa ka nung Pakistan nungi tongti ketdangser kati India sendangtsü. Tang SCO nung Tirji India lir aser taküm küm tatembanglen SCO linüktem nungi tekolakpurtema senden amentsü.

Bilawal Bhutto Zardari leniba nung Pakistan nung ketdangsertem telok ka arutsü aser May 4-5 anogotem nung Goa nung ayongzükba SCO senden nung adentsü, ta Pakistan foreign ministry nungi ketdangser kati metetdaksü.

Shanghai Cooperation Organization ya 2001 küm Shanghai nung tentetba intergovernmental organization ka lir. SCO tongti nükjidongji kidanger linüktem aser züingsem linüktem tsüingda tesendaktep tajungba akümsü; yimtenren, shishilembaba, rongsenketzüng aser tanga lenla balala nung amalitep ajungkettsütsü atema lir.

Pakistan Foreign office otongdar, Mumtaz Zahrah Baloch-i, "Bilawal Bhutto Zardari leniba nung Pakistan ketdangsertem telok ka SCO Council of Foreign Ministers (CFM) nung adentsü. Iba sendenji May 4-5, 2023 anogotem nung Goa, India nung akatsü," ta metetdaksü.

SCO nung züingsem linük 8 ji China, Russia, India, Pakistan, Kazakhstan, Kyrgyzstan, Tajikistan, aser Uzbekistan linüktem lir. Iba dak alia SCO observer linük pezü (Mongolia, Iran, Belarus, Afghanistan) lir aser Dialogue partners linüktemji Azerbaijan, Armenia, Sri Lanka, Cambodia, Turkey, Nepal, Egypt, Qatar aser Saudi Arabia lir.

Laisa, India external affairs minister S Jaishankar-i jaokba ama Pakistan foreign minister iba senden nungji adentsü, ta metetdaksü. India aser Pakistan na tsüingda tesüiba küm aika mangatetep adoka

SCO nung züingsem linük 8 ji China, Russia, India, Pakistan, Kazakhstan, Kyrgyzstan, Tajikistan, aser Uzbekistan linüktem lir. Iba dak alia SCO observer linük pezü (Mongolia, Iran, Belarus, Afghanistan) lir aser Dialogue partners linüktemji Azerbaijan, Armenia, Sri Lanka, Cambodia, Turkey, Nepal, Egypt, Qatar aser Saudi Arabia lir.

Sudan nung tensa majung; India nung atema bilemetsür: MEA

New Delhi, April 20 (Agencies): Brihostibarnü Centre sorkari, tang Sudan linük nung tensa kanga mejungi lir aser India nung sensotem kümzüka alitsü atema sorkari linük aika den tongtepratepdar, ta metetdaksü.

nung aliba sensotem aniteta anir arutsü asü?, ta asüingdangba langzüdang Bagchi-i, sentong karbo yangludar, ajsüüaka ibaji tensa mapang ajangadang metettsü, ta ashi.

Osangbenertem senden ka nung Ministry of External Affairs (MEA) otongdar, Arindam Bagchi-i, India-i Sudan linük nung tatalokbatem mita repringdar, ta metetdaksü.

Brihostibarnü EAM, Jaishankar-i Egypt Foreign Minister, Sameh Shoukry den Sudan tensa atema jembiogo aser tenati iba tensa atema maneni osang metetpelatsü bangjema liasü.

Paisa, External Affairs Minister S Jaishankar-i New York nung UN Secretary-General ajurua Sudan tensa a t e m a jembitsü, ta metetdaksü.

Bodhbarnüa Jaishankar-i Saudi Arabia aser United Arab Emirates (UAE) nungi Foreign Minister ana den Sudan tensa atema jembia liasü.

SBI State Bank of India
 STRESSED ASSETS RECOVERY BRANCH, JORHAT
 Na-Ali, M G Road, Jorhat, Opp. ASEB Building, PIN-785001 (Assam)
 Tel No : 0376-2300193 / 2300204

Appendix - IV-A
 [See Proviso to rule 8 (6)]
KIOJEN AYOKTSÜ NOTICE

Securitization and Reconstruction of Financial Assets & Enforcement of Security Interest Act, 2002 read with proviso to Rule 8(6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice agütsür.

Public aser talisa sen apur(tem) aser Guarantor(tem) dang iba sangdong agütsür, Secured Creditor dang mortgage/charge asüba tsüinglanglen shia aliba kiojen State Bank Of India nung Authorized Officer-i **20.06.2023** anogo nung agiadokogo, aser iba kiojenji "Kong koma ali", "Koma lidir yamaji" aser "Yangji aliba ajak" asütsü, 10.06.2019 anogo tashi nung Rs.2,13,42,360.49 (Rupees Two Crores Thirteen Lakhs Forty Two Thousand Three Hundred Sixty and Forty Nine Paise only) alanzüksü atema kiojen agiogo, iba denji külemi sen tetemlok, cost, charges aser tanga teindokba balala adentsü aser ibaji **M/s. Ayemi Bamboo Products, Proprietor aser Guarantor - Shri Phushito Ayemi** dang nungi secured creditor-i agitsü.

Reserve price ji **Rs.3,25,85,000.00** aser earnest money deposit ji **Rs.32,58,500.00** asütsü.

Kiojen osang
Property ID: SBIN400016264948
 1) Block- Naharbari (PK), Mouza No-3, Dimapur, Nagaland nung Shri Phushito Ayemi tenüing nung aliba Dag No-474, Patta No-138 nung kimong tasazük 1 Bigha, 1 Katha, 6 Lechas (18144 Sq. Ft.) den RCC Residential buildings, Factory Shed, Boundary Walls aser tanga civil constructions ajak.
 Bounded:
 North tsütsü T C K Lotha kimong, South tsütsü Joba Mech kimong, East tsütsü Joba Mec kimong aser West tsütsü Joba Mec kimong.
 Iba sale atema telatetbatem tejangja yangi angutsü- State Bank of India, secured Creditors website:
<https://sbi.co.in/web/sbi-in-the-news/auction-notices/sarfaesi-and-others>
 and https://ibapi.in/Sale_Info_Home.aspx
 Anogo : 19.04.2023
 Tesem : Jorhat

Authorized Officer,
 State Bank of India, SARB Jorhat



TIR YIMYIM YIMOBILEM (EDITORIAL)

DIMAPUR ROGONÜ, RONGCHII (APRIL) 21, 2023

Dimapur nung ILP

Assam nungi razüka Nagaland ya state balaka akümdangyongi Nagaland arrtsü atena aiter bendangerbo ajak temelaba Inner Line Permit nungdaktsü ta telemtetba agia liasü. Iba telemtetbaji Nagaland akümba tangatettep onük koba dang '16 Point Agreement' ta ajar, iba onüktem rongnung tesüsuba tangatettep onük 16 buba nung shia lir. Iba onük 16 buba nungji English agi "The Rules embodied in the Protected Area Act 1958 shall remain in force in Nagaland," ta shia lir. Tetezüji, "1958 küm latetba Protected Area Act nung keta aliba ozüngtem ajak Nagaland nung amshitsü," ta latetba lir. Aji oda, Protected Area Act 1958 nung Bengal Eastern Frontier Regulation 1873 nung shia aliba ama Inner Line Permit nungdaktsüba indang shia lir. Inner line tetezüji British India yimli mapang parnoki tesem kar tangar bendangertem nem mamoksepdaktsütsü aser lendonga mataloktsü asoshi wazüka ayuba tesemtem lir. Iba tesem nung bendanger ka tetsüng ajemoktsü atemabo temelaba nungdaktsüsa British India yimteni lateta liasü. Item wazüka ayuba tesemtem rongnungji Naga nung aliba tenem limatem ya dena liasü, anungji Nagaland state akümdang state tasenba Nagaland nung Protected Area Act, 1958 nung keta aliba ozüng ajak amshitsü ta latetba agi, Nagaland state tenzüka anogo nungi bendanger ka Nagaland-i arutsü aser amongtsü atemabo temelaba "Inner Line Permit" nungdaker. Ajisüaka, asenoki temulung agüja meinyakba agi asenok tamakok aser takoksa anguba kaji, Nagaland tenemlena tanü tashi ILP ozüng ya asenoki junga mebeshitetter aser lenden lima Dimapur nungbo ILP mamshir ta mapang talangka lia aruogo. Iba jagi Dimapur yabo anakawa endokdak tesem ka ama, alima tesem ajaklen nungi kecha tenokdangba melii arua amongtsüba dang masü saka senso kuma litetba alima tesem tesadem ka kumdaktsüogo. Iba amaji, asenok dang nungi bendangertem teimba kuma züinaka, asenoki kecha hau ta mali asenok government ita sen tilaka agizükba ajakji asen mapa inyaktür bendangertem nem agütsür, tanüngba senjia bendangertemi lapokba dokantem nung asen nungdak atema ajak züngtsür ta memeteti asenok akaba ajak agi bendangertem takar kumdaktsür. Aji oda, joko asenok lisopurtemi bendangertem Dimapur nungi meindoktsüba masü saka bendangertemiang asenok meindoktsüsa nütsüng nübo aser rongsen agi parnok teimba aser tashi taitba kumogo. Iba ama tensa mapang ka nung, kodanga meinyak yutsüba dang nungibo menur asüyonga inyak tajungba ta asüba amato, tang nungi danga Dimapur nung ILP amshi tenzüka ya Nagaland nung alir Naga nung asoshi dang masü saka Naga nung masüyonga shirnok Nagaland state akümdangyongi Nagaland nung liasü, parnok ajak asoshi tang aser tarutsü atema tajanzük asütsü. Atangji, Nagaland nung lisopur akümtsüba pa mesüra la tenüng mesüra par tsüraburtem tenüng Nagaland state kümer 1963 küm mezüng electoral roll adokba nung zülüoka alitsüla. Ibayongji, tsümar asüyonga 1963 küm jakdang arurtembo Nagaland senso akümer. Iba jagi mezüng Dimapur Assembly Constituency nungi adoker MLA-tembo Naga nung masü tsümartem liasü. Ajisüaka, tang Dimapur nung ILP amshitsü atema yabo government-i November 21, 1979 anogo aser küm agir, ibaji khen bilemdangtsüla adoktsü, kechiyong iba jagi Nagaland nung Naga nung masüba nübortem rongnung telok tapu ana adoktsü, telok ka 1963 küm December 3 tashi nung arur aser kaji 1979 küm November 21 tashi nung arurtem. Atangji, Dimapur nung iba mapa bentettsüba ya mapang agitsü, ajisüaka tang danga asenoki bendanger ket nungi asen lima kümzüka ayutsü atema ILP ozüng ya shitak mapa kuma beshitetra, iba jagi tarutsü Nagaland pi ket nungi kümzüka yutsür asütsü. Atangji, Nagaland nung bendanger shinga marudaktsütsü aser shinga melidaktsütsü ta masü, kechiyong Nagaland ya Naga nung kisüng agi merenlokaktsütettsü saka maparen ajak ozüng ka kübok aotsüla. Aji ta masü ser tang amato mezübelanger, tebilemba ajak agi sen dak dang rangloker lira, aseni tanü yangluba bara ki aser alu ajak asüng bendanger meyong akümtsü aser asenok chirnurtem bendanger kümer, bendangertemiang parnok madak yimsü asütsü. Iba ama tarutsü tensaji yimdangi arua shisabolua bilemdi aser sen dang nungibo asen temeten aser tarutsü chirnurtem anogotemji tongtibangba ta bilema inyakdi.

OLEMSABANG

AROGO YABO ALIMA LOKTI-TENTET KA AMA MASÜ

~ L.Kika Pongener.

(Yashi adok nungi...)

Anungji arogo nungbo kija aser telok-tentet shingaia/kecha-ia tashi amshia kibur akümtsü makok. Kecha telok-ia arogo nung jangjongmara-a, meinperonga, timtem agütsütsü makok, kecha telok-ia arogo nung teka amuoka tashi amshitsü makok. Alima yimden-yimli tashi, sorkar bangdak tashi kecha agia arogo nung teka amuoka tashi amshitsü makok. Aji oda, alima yimden-yimli, lokti-tentet balala aser arogo, kati ka akümtsübutepa, amalitepa, sentaktepa aser longjema alitsü ajibo tim mapa asütsü. Arogo ka inyakyim aser sentong ajungaji laishibai kechi tuyur/sayur ta asüngdanga/medemdanga anitsüba dak alaka nisunger tashitemetet shisatsü agi arogoji anitsü makok.

Yisu Khristai arogo nem teinyaktsü nungloktsübaji, "Nenoki oang aser kin ajak nutsüngtem kümdakjang; Tebu, Techir aser Tanela Temeshi tenung nung parnok baptijang; ni nenok dang kechisa mela ajak beshitsü parnok dang sayuang" (Mt-28:19; Mk-16:15; Lk-24:47). Anungji arogo teinyaktsü mapa tongtipangbaji, nutsüngsuba, tenyaba aser tanela anir aruba mapa item ya asütsü. Kanga tesusatsüka, tanü lim arogotem nung Yisui nungloktsüba item mapa dang nungibo rongsen ketdangsuba mapa aser terenlok mapatem-ang kanga agi tongtipangba kumdaktsür inyakba angudang kanga sasa-a bilemer. Arogo ka ainba noksaji arogo terenlok mapa nung renloka aoba ya masü, saka tenyaba mapa, tanela anir aruba mapa aser nutsüngsuba mapatem koba tashi ka inyaker (?) Iba-jiang kanga agi tongtipangba lir. Ano Yisui arogo nem agütsüba tashi (Authority)-ji "Nenoki kechisa alima nung alendir aji Kodak nung alentsü aser nenoki kechisa alima nung saladir aji Kodak nunga salatsü" (Mat-16:19). Anungji tanü arogoi kechisa ketdangsuba inyaker item inyakyim mapatem ajakji Tsüngremi agizüktettsüsa inyaktsü kanga tongtipang lir. Kechi mapa inyakdir inyak-aka laishibai kechi melar (?) Aser Tsüngremi mulungba asü masü (?)...ta asüngdanga laishiba den medemdanga inyaktsüla.

Ano arogo nung toklanga tenzükertem, Deacon-tem, tenzüker/tenzüklatem aser arogo nung züngsem tajung ajaki kanga junga angatettsübaji, Yisui pa zü kangki nung tenla agüja alanzükba arogo dak tarak akettsüsa, timtemtsüsa, teraksa/telemsa adoktsüsa kari inyakra pa/la-bo aiatai asütsü, kechiyong arogo ka dak tarak ketdaktsüba, yirudaktsüba, lemsatsüsa inyakbaji, Yisu Khrista temang tenuk-telen nung timtem agütsür, yirutsür aser raksatsür asütsü. Yisui shiogo, "Iba lungma nung ni kü arogo yanglutsü" (Mat-16:18). "Aser iba lung manung shiba tsükdir pa anuka raksatsü; aser shiba dak iba lung tsükdir pa aoyi kuma menungsatsü" (Mat-21:44). Atangji shirnoki arogo nung tashiyim agi tashi amshidir, arogo nung mepetmesü, telemsa adoktsüsa sentong atongdir, mesüra arogo anema apusodir, pa/la-bo aiatai asütsü. Tsüngrem o-i ashir, "Kibubai pei azü agi alizükba arogo mesütsü asoshi koba nung Tanela Temeshi-i nenok sannukertem asütsü shimtet iba san telok aser nenok asoshi kümdangang" (T.Mapa-20:28). Kümdangang ta ashiba o-ji kanga tetsübuttsü lir ta angatetdi. Anungji na aser ni Khristar arogo nung yangluloker tajung ka-ka asütsü merangdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh nung Protestant Arogo lenir 10 bail nung chioktsü



Taküm January ita nung Chhattisgarh state yimtiba, Ranchi nung tribal Khristantemi longkak aيتدang tangokba noksa nung angur.

April 20, 2023: Central India nung aliba court kati Protestant Arogo nung lenir 10 bail nung chioktsü obendang agütsüogo.

Taküm January ita nung Chhattisgarh nung tribal Khristantem aser akhi yimsü amangertem tsüngda rara adokba sülen Khristan lenirtemji pua liasü.

Chhattisgarh nung temaba court, Bilaspur High Court-i April 19 nü pastor tem aser evangelist tem densema Khristan lenir 10 nem bail agütsü, aser parnok dang iba ken o bushisüngdangba nung police den amaliteptsü metetdaksü.

Khristan lenirtem atema ken o jembitsür, Lawyer Son Singh-i, "Bail maparen tembangba sülen anogo ka-ana tsüngda parnok ajak chioktsü," ta metetdaksü.

Singh-isa, "Parnok nem tiyazü nung tai tonglokja liasü, ajisüaka parnoki aibelena

maliba kuliji court nung agütsütsü," ta metetdaksü.

Khristan lenirtem jagi ki rongdoktsü, raraba hadir liasü, sorkar tenzükertem yirutsü aser asalentong tamajung liasü, ta tai tonglokja liasü.

Iba ken o nung Khristan lenirtemji aitsüra parnok küm 10 tashi tepuokdak ayutsüa akok aser senchi-a achitsü.

Chhattisgarh state kübok Narayanpur district nung Khristan yimsü agizükertem aser akhi yimsü amangertem tsüngda rara adokba sülen January ita mezüngbuba hopta nung Khristan lenirtemji pua liasü, ta Arogo lenir kati metetdaksü.

Bushisüngdangba team kati ashiba agi, Narayanpur district kübok yim 18 aser Kondagaon district kübok yim 15 maaka liasü, aser iba mapang nungji tribal Khristantem aika yiru. Khristan yimsü agizükertemi Khristan yimsü toktsütsü

memelungba ajanga rara adoka liasü.

Yaküm December ita nunga yimsü balala amanger tsüngda rara adokba ajanga iba area nung aliba yimtsüngtem nungi nisung 1,000 shi jenshia liasü.

April 20 nü osangbenertem den jembidang Khristan lenir kati, "Iba rara nungji Arogo lenirtemi shilem magi, ajisüaka parnoki takoksa angurtem semdangba ajanga iba ken o nung parnok nem tai tonglokja liasü," ta metetdaksü.

Congress sorkar aliba Chhattisgarh nung Khristantem anema inyakba kanga bulua kümogo. Tang India nung Khristantem anema inyakba tatalokba teimba aliba state ji Uttar Pradesh lir, aser tanabuba jenjang nung Chhattisgarh lir.

Chhattisgarh nung nütsüng million 30 shi lir saka Khristan nütsüngbo shilem 2 den tajemba lir.

Khristan aser Muslim nungertemi VHP anema takhangba agütsü

April 20, 2023: Tawa Chhattisgarh nung Hindu right wing telok kati Hindu nungertem dang Khristantem aser Muslim nung den shishilemba masütsü ayongzükba aser tenangzükba agiba atema Khristantem aser Muslim nungertemi parnok aitsüogo.

Right wing telok jagi Hindu nungertem dang Khristan aser Muslim nung den dokan nung meshishitsü ayongzükba liasü.

Inter-Denominational Church Fellowship nung Secretary, Jitendra Faular Singh-i, "Khristan aser Muslim nung den dokan nung shishilemba masütsü ayongzükba ajak nem temerenshi agütsütsü," ta metetdaksü.

Inter-Denominational Church Fellowship nung ya tribal nütsüng aiika aliba Bastar region nung Khristan telok 18 densema lir.

April 19 nü osangbenertem den jembidang Singh-i, "Onoki Bastar Division nung Commissioner aser Inspector General na nem temepishiba shidi agütsüogo," ta metetdaksü.

Anogo 10 shi tejaklen World Hindu Council (Vishwa Hindu Parishad) aser Bajrang Dal nati Khristan aser Muslim nung den dokantem nung shishilemba masütsü atema yimjak nung tenangzükba agia liasü.

April 10 nü Bastar region indang divisional headquarters Jagdalpur nung parnoki Khristantem aser Muslim nungertem anema tenangzükba agi. "Nenoki akhangba ama inyaktsü, ta ketdangsertemi onok dang shiogo," ta Singh-i metetdaksü.

Ano külen Muslim nungertem telok- Anjuman Islamiya Committee-ia shidi ka ajanga Commissioner dang, "Muslim nungertemi tanga yimsü amanger ajak den yimjung nung alir, ajisüaka Muslim nungertem den shishilemba masütsü ayongzükba ajanga onok melung kanga yiruogo," ta ashi.

Khristan lenir, Singh-i, "Teti kü dokan nung shishilemba masür. Iba ama rongsenketzung tsütsü tenokdangba ajanga yimsü balala amangertem

külemi tesünep nung aliba tensa raksatsür, anungji aibelenertem nem tatok magütsütsüla," ta ashi.

Hindu nungertem jagisa Hindu nungertem dang parnok meyong dokantem signboard nung Hindu maitsü inokang, ta metetdakja liasü.

Osangbener den jembidang business inyaker Khristan kati, "Khristantem aser Muslim nungertem den shishilemba masütsü tayongzükba agütsüyonga Khristan aser Muslim nungertem nung takoksa mangur (income ajema maküm), ajisüaka teti kü dokan-i arur customer karbo joko ozü dokan-i marur," ta metetdaksü.

April 08, 2023 nü Bemetera district kübok Biranpur yimdak tamangba lokti ana tsüngda rara adokba sülen Chhattisgarh nung tensa mesüngjemteti aliba mapang Jagdalpur nung right-wing teloktemi longkak aita tenangzükba agi aser tenangzükba agiba video ji online nung prokshia liasü. VHP lenir, Mukesh Chandak-i ketdangtsüa nisung 70-80 shii tenangzükba agia liasü.

ANOGO ABEN TSÜNGREM DEN

Sarasadem telangzüba angutsü jenjangtem

T.Ken 99: 1-9

Khristan taküm nung tepela tulutiba kaji sarasadem telangzüba angubaji lir- tangar dang "Tanü Tsüngremi kü sarasadem langzüogo" ta ashiba, mesüra kari "Sarasademtsüba asoshi pelar- Tsüngremi kechi inyak ni ne dang shidi" ta ashiba angashiba. Ken züluri iba indang zülu: "Putir rongnung Mosa o Aaron, aser ne dang sarasadem rongnung Samuel; parnoki Kibuba dang sarasadem, aser pai parnok dang langzü" (t.6). Nübur asoshi khuret bena alidang Mosai Tsüngrem dang aiben aja. Temaba putir ka ama Aarona Tsüngrem dang aja. Samuel pa taküm nung mepelaba kar liasü. Par kibong koma alitsü tim yamaji mali asü, aser Israel nungertem koma alitsü tim yamaji mali asü. Anungji pai Kibuba dang ayimten.

Asenoki Kibuba dang jara pai langzüksü asü? Au, asenoki Mosa, Aaron aser Samueli inyakba jenjangji tongtetra Pai asen sarasadem langzüksü. Mezüngbuba, parnoki Tsüngrem o angaa ali. "Pai mepet tongshi nungi parnok den jembidi: parnoki pa kulitem, aser pai parnok nem agütsüba ozüng ayu" (t.7). "Nenoki kü dak lira, aser kü o nenok dak lira, nenoki kechisa aginer meshiang aser aji nenok dang inyaktsü" (Yn. 15:7). Asenoki Tsüngrem den jembiner aser asen tebilemtsü ajak pa dang shiner. Pai asenok den jembiner aser Pa tenangzükbatem shiner. Asenoki Pa dang tama angaa alitsüla, idangji pai asen dang angatsü.

Tanabuba, parnoki pa dang tashi anga. Parnoki Pa taküm kulitem aser ozüngtem ayu. Sarasadem langzüksü asoshi tashi angabaji tenüngdaksü. Asenoki Khrista nung lira, asenoki Pa o nung tashi angatsü, idangji asenoki Pa dang ajatsü akoktsü.

Tasembuba, parnoki parnok temenentem nangzük, aser Pai parnok nem kechi inyakdaksünü aji inyakdaksü. Iba nungi adokbaji parnoki Kibuba uludaksünü. Sarasadem nükjiongji Kibuba sentsüwangshidaktsütsüba. "Aser Pa temeshi tenüng nung külemang; kechiaser ozü Tsüngrem Kibuba temeshi" (t.9). Ni koda tepelatsü kü temaba putiri kotak nung ni asoshi mepishitsür. Ni taochi nungdaker ibaji asoshi ni mashi mapang nung Pa dangi arutsü akok.

Sarasadem langzüba nung nai pelar asü? Nai Tsüngremer O angaa alir asü, aser iba nung tashi angar asü? Sarasadem telangzüba angutsü asoshi Tsüngremi yanglutsüba jenjang tongang aser Pai na moajang.

Ramzi Khoury-i Palestine nungertem Khristantem yaritsü mepishir



Ramzi Khoury

April 20, 2023: Bodhbarnü Palestine nung Higher Presidential Committee of Church Affairs-i alima nung Arogo lenirtem dang Palestine nungertem Khristantem yariang, ta mepishiogo.

Iba committee nung tongti, Ramzi Khoury-i shidi ka ajanga, Palestine nungertem Khristantem lendong nung lir, anungji Palestine nung aliba Khristantem yaridaksünür, ta

mepishi.

PLO Executive Committee nunga züngsem Khoury-i tang Palestine nung tensa, talisa Khristantemi ajangshiba timtem balala metetdaksü.

Paisa, tawa Palm Sunday aser Holy Saturday nunga Israel nungertem Khristantem anema inyakba aser temeshi tesemtem anema inyakba metetdaksü.

Khoury-isa Ramadan ita nung Israel-i Muslim nungertem anema inyakba, Israel sepaitemi Al-Aqsa Mosque mita aoba aser mosque nung lia Palestine nungertem dak injang khaloktsüba metetdaksü.

Israel aja pai alima nung Arogotem aser sorkartem dang Israel-i Palestine nungertem Khristantem aser Muslim nungertem anema inyakba nokdangtsü mepishi.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Pongpongtsü

(n) ninang tetsüng aser tashikang tentetli aliba mapang (young bee)

* Ninang tesepong nung pongpongtsü aliba mapang meraksatsütsüla.

Pongscü

(n) mokopong nung jana (dirt in smoking pipe)

* Pong nung moko achirtemi pongscü endoker achir.

OLONG PAITEP # 6491

Grid for OLONG PAITEP # 6491 with numbers 1-15 in various positions.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6490 TELANGZÜBA

TIPIEN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Sүjak, 10. Aonung, 11. Dokan, 13. Tinu.



ALOKBA SUGAR ASER HIGH BLOOD PRESSURE AGI KHANGSHIBA INDANG RASAA ASHIR :

Sobangba : Temba, na sugar aser high blood pressure agi khangshiaka kanga junga azüoka lidar ta angashia kanga pelar ako, anogoji komasa tenzüker?

Alokba : Anepdang sakbaji tejak-tepang shidoka tasürbo tzu talem nung tinga tera ajetoker ajemtsü, khenpika lir breakfastji apple ana, papaya tamen ka aser grapes tera chirbo kodang chiyungtsü mapang atonger idangji boil rice denbo süngolio boil mejaka chiyinger ati aser...

Warakla : Iba sülenjibo ni kidang timba malirji kidang aliba ajak aroktena, akshi temo, chow-momo, ano temo aketba chiyungtsü hotel nungi alia chili, mozükidangi oli, sensa sen züngtsüli ta anepaludarko, nü tembajia.

Sobangba : Temba, tanurtem aser kinungtsü den Khendanga arishia linüra tebang azüoka liangma.

- Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Imphal nung angati temulungjang surgery camp ka tenzüko

Imphal, Rongchii/April 20 (Agencies): William Novick Global Cardiac Alliance USA, Manipur Heart Foundation, aser Sky Hospital Research Centre, Imphal longjemer hopta ana tanurtem temulungjang surgery camp ka agitsü aliba Manipur Chief Minister N Biren Singh-i Brehostibarnü Classic Grande, Imphal West nung lapoktsüogo.

Iba camp ya northeast nung ibala mesükba camp tulutiba asütsü aser tanur 26 anepalutsü atema nukjidong lir.

Sentong nung o jembiba mapang Manipur CM-i ashiba agi, temulungjang meshidak aliba tanurtem angati agi

temang anepalutsütsü atema USA nungi mongintem team ka aruba ya jangrademtsü ka lir.

Manipur CM-isa Twitter nung, "health sector nung William Novick Global Cardiac Alliance, USA amala international corporation tem den longjemer inyakba ajanga state nung treatment tajungtiba aser world-class health facilities agitsü atema maongka agütsür," ta ashi.

William Novick founder CEO cum medical director Dr William Novick-i anir mongintem parnok 14-i heart surgery camp ya achaayangtsü. Pai ashiba agi, par team-i tang agi pongubenbuba India

semdanger.

William Novick-isa, taoba mapang India semdangba mapang pai tanur 9965 semdangogo, shirnok India kübok medical institutions balala nung kanga takok ngua operation agitsüogo, ta ashi.

Sky Hospital mendenbuba Dr L Shyamkishore-i ashiba agi, temulungjang nung timtem keter asoba tanur tsürapurtem atema iba camp ya kanga tajangzük tulu asütsü.

Dr Shyamkishore-isa, mezüng tenüng agütsürtem aser BPL nung aliba kibongtem nem tama maongka agütsütsü, ta ashi.

Centre-i NE nung tribal tem atema scheme la amenoktsü

New Delhi, Rongchii/April 20 (Agencies): Union Tribal Affairs Minister Arjun Munda-i, Northeast nung aliba tribal temi yangluba osettem yokyatsüyatsü aser value addition ajungkettsü atema Centre-i sponsore asüba scheme ka amenoktsüogo.

'Marketing and Logistics Development for Promotion of Tribal Products from Northeastern Region' (PTP-NER) amenoktsüba sentong nung minister-i ashiba agi, TRIFED (Tribal Cooperative Marketing Development Federation) ajanga iba scheme ya nüburtem tangar dak metaloker malitsü aser pei akokba mapa inyaktsü asoshi tashi agütsütsü nukjidong nung amenokogo.

Imphal nung iba sentong agiba mapang Manipur Chief Minister N Biren Singh aser tanga ketdangsurtemi shilem agia liasü.

Munda-i ashiba agi, Ato Kilonser Narendra Modi-i, tribal temi yanglutetba osettem ajungkettsü atema 'One District, One Product' national programme indang mapangshia jembia aruogo aser TRIFED-i

"Ato Kilonser nukjidongji anütoklen temulung agütsütsü aser tribal entrepreneurs tem libaliro ajungkettsütsü atema tribal temi yangluba osettem ajungkettsü aser terenlok asoshi rangloker inyaktsü atema lir. Item tesemtem ya tribal tem aliba tesem asünung tribal lokti angatetsüji kanga tongtibang," ta minister-i ashi.

Imphal nung iba sentong agiba mapang Manipur Chief Minister N Biren Singh aser tanga ketdangsurtemi shilem agia liasü.

Munda-i ashiba agi, Ato Kilonser Narendra Modi-i, tribal temi yanglutetba osettem ajungkettsü atema 'One District, One Product' national programme indang mapangshia jembia aruogo aser TRIFED-i

state sorkar aser tanga agencies tem den longjemer item osettem ya ajungkettsü.

Northeast nung lenla ajak nung lenmang sadema lapoka lir aser tribal temi linük terenlok asoshi takokba tashi inyaka arudar, ta pai ashi.

Maneni paisa, tribal entrepreneurs aser beneficiaries tem national aser international jenjang nung shishilembatsü atema teyari agütsütsü asoshi iba jenjang agiogo aser sorkari maneni tribal tem nem teyari agütsütsü atema scheme talila amenoktsütsü, ta ashi.

Iba sentong yagi Arunachal Pradesh, Assam, Manipur, Meghalaya, Mizoram, Nagaland, Tripura aser Sikkim nung aliba tribal tem ayimjema inyaktsü.

Sikkim CM PS Tamang-i Dalai Lama den ajurutep



Brehostibarnü New Delhi nung Sikkim chief minister Prem Singh Tamang-Golay-i Dalai Lama den ajurutepba noksa nung angur.

Gangtok, Rongchii/April 20 (Agencies): Sikkim chief minister Prem Singh Tamang-Golay-i Brehostibarnü New Delhi nung Dalai Lama den ajurutepogo.

"His Holiness, 14th Dalai Lama den tanü New Delhi nung ajurutepba atema onok kanga pelar," ta Sikkim CM PS Tamang-i ashi.

Sikkim CM-isa, "pai shisatsü aketba o aser tesayuba balala agütsüba ajanga onok aser state nung aliba nüburtem maotsüogo," ta ashi.

Tamang-i, pa (Dalai Lama) October ita Sikkim semdangtsü atema jaoka liasü.

"Onoki pa (Dalai Lama) jaokba pai pelashishia agizükogo," ta Sikkim chief minister Prem Singh Tamang-Golay-i ashi.

"Sikkim nung aliba nüburtem tenüng nung ni pa dang kanga pelaba lemsateper," ta CM-isa shisem.

Temetetsükaji tawa Dalai Lama-i, pa temeli meseptsü ashiba dak sendakba nung mangatettep adokba sülen Sikkim CM PS Tamang-i pa

pusema jembia liasü. Sikkim CM PS Tamang-i ashiba agi, pa (Dalai Lama) tenüng menüksütsü atema olulu osang prokshidar.

Maneni Sikkim chief minister-i, "Sikkim nung ajak HH, 14th Dalai Lama den nokdaka lir aser ajak dang pa tenüng menüksütsü atema olulu osang prokshiba nungi pila alitsü mepeshir," ta ashi.

Video ka nung Dalai Lama-i tebur chanu ka dang pa temeli meseptsü ashiba social media nung prokshiba sülen mepetmesü tulu adoka liasü.

[See Regulation-15 (1)(a)] / 16(3)

DEBTS RECOVERY TRIBUNAL GUWAHATI

Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)

Case No.: OA/450/2022

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No.: 3091

CANARA BANK VS ER N NYIMTHUNGO LOTH



To, (1) ER N NYIMTHUNGO LOTH D/W/S/O- Son of Mr S Nkhyingo Lotha Son of Mr S Nkhyingo Lotha Resident of 7th Miles Block 4 236 Chumukedima Dimapur 797112 Dimapur,NAGALAND -797112

(2) SRI BILSON KIKON

RESIDENT OF NAGARJAN DIMAPUR 797112 DIMAPUR,NAGALAND -797112

SUMMONS

WHEREAS, OA/450/2022 was listed before Hon'ble Presiding Officer/Registrar on 31/03/2023.

WHEREAS this Hon'ble Tribunal is pleased to issue summons/ notice on the said Application under section 19(4) of the Act, (OA) filed against you for recovery of debts of Rs. 3545806.92/- (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under:-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/ or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 09/05/2023 at 10:30A.M. failing which the application shall be heard and decided in your absence.

Given under my hand and the seal of this Tribunal on this date:03/04/2023.

Signature of the Officer Authorised to issue summons.

Assistant Registrar Debts Recovery Tribunal Guwahati

Note :Strike out whichever is not applicable.

TENÜNGSANG AGÜTSÜR

Dr. Markangla Jamir (W/o. Mr.Kikatemjen Longkumer), Doctor of Philosophy (PHD) in Education on the thesis topic, "A study on Vocational Interest and Parental Influence on career choices of Adolescents in Nagaland" under the supervision of prof. Buno Zetsuvi and Dr.B.Venkata Rao, Department of Education Nagaland University, Kohima campus, Meriema nungi degree ngutetba asoshi asen Tetanglur Tsüngrem nem tenüngsang agütsür aser la nem akhüm tetushi agütsür.



Tarutsü anogotem nung la taküm aser kibong Tsüngremi len aniang ta sarasademtsür.

Temeim nung Okula Aosungkum-er Sosem Ungma.

Form No. 14 (See Regulation-33(2))

OFFICE OF THE RECOVERY OFFICER-III DEBTS RECOVERY TRIBUNAL GUWAHATI Suwaran Bhawan, House No.12, New Town Path, Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE NOTICE UNDER SECTIONS 25 TO 28 OF THE RECOVERY OF DEBTS & BANKRUPTCY ACT, 1993 AND RULE 2 OF SECOND SCHEDULE TO THE INCOME TAX ACT, 1961. RC/2258/2017

INDIA SME ASSET RECONSTRUCTION COPMANY LTD.

Versus NEINGUPE THERIE THERIE

To, (CD 1) NEINGUPE THERIE THERIE, LATE LEBOU THERIE 1ST FLOOR MAGESTIC BUILDING NEAR IOC KOHIMA NAGALAND Kohima- 797001

Presiding Office, DEBTS RECOVERY TRIBUNAL GUWAHATI- AO/194/2015 ajanga tetuyuba agütsüba aser Recovery Certificate issue asüba dak ajemdaker sen 3991904.31 (Rupees Thirty Nine lakhs Ninety One Thousand Nine Hundred Four and Paise Thirty One only) den tetemlok @13.50% 01.07.2015 nü nungi tenzüka sen 43,000 (Forty Three Thousand) maoba tashi na (Jointly and Severally/ Fully/ Limited) due aliba metetdaksür.

Table with 2 columns: Description and Amount. 1. Recover certificate dak ajemdaker sentsüh aliba : Rs. 39,91,904.31 2. 01.07.2015 nungi 01.04.2018 tashi @13.50% nung sentsüh : Rs. 18,61,784.52 3. Costs : Rs. 43,000.00 Total : Rs. 59,96,688.83

2) Iba osang agütsüba sülen anogo 15 tsüngda temalen shisema aliba sentsüh aotsü metetdaksür aser sentsüh maotetra Recovery of Debts Due to Banks aser Financial Institution Act.,1993 aser iba kübo Rule tem dak ajemdaker sentsüh meyipa agütsü. 3) Nü dang ken o tanaben mangadang tsüngda kiojen/ali kimong indang odang affidavit ka ajanga sangdongtsü metetdaksü. 4) Ken o maneni asadangtsü atema na ketdangtsür den 11/05/2023 nü 10.30 ako ajuruteptsü metetdaksür. 5) Temalen shisema aliba sen den nai a)certificate/execution proceedingsindang notice agütsüba mapang nungi tenzüka tetemlok aotsü. (b) iba notice dak sendakba service ate maser tanga inyakyim atema sentsüh intokba ajak nai aotsü. Tribunal seal-i tashi agütsüba dak ajemdaker 11/01/2023 nü iba tetuyuba agütsür.

Sd/ Recovery Officer, DEBTS RECOVERY TRIBUNAL GUWAHATI

ALI AYOKTSÜ LIR

Foothill Road nungi 2 minute, Hozukhe Village Rs. 25/- per Sq.foot. Contact : 8974869756, 8259001052

Bilawal Bhutto-i India nung SCO senden nung shilem agütsü Islamabad, Rongchii/April 20 (Agencies): Pakistan-i mezüngbuba asütsü. Pakistan Brehostibarnü sangdong ka Foreign Office otongdar ajanga foreign minister Bilawal Mumtaz Zahra Baloch-i ashiba Bhutto-Zardari-i anir linük agi, SCO foreign ministers nungi delegate tem Shanghai senden ya May 4 aser 5 nü Cooperation Organization amentsü. (SCO) Summit nung shilem "Bilawal Bhutto Zardari-i agütsü, koba Goa nung May ita anir Pakistan delegate tem agütsü lir ta metetdaksü. SCO Council of Foreign Bilawal-i India semdangtsü Ministers (CFM) nung shilem aliba ya Nawaz Sharif-i 2014 agütsü, koba May 4-5 nü Goa, küm semdangba sülen Pakistan India nung akatsü lir. nunger lenirtem rongnungi (Maneni tapak 8 nung...)

Yemen nung Ramadan charity sentong ka nung nisung aika asü



April 20, 2023 : Sanaa, Yemen nung lokti senden ka nung nisung aika ajemsetba sülen ANSAR ALLAH HOUTHII MEDIA OFFICE-i lemsatepba noksa ka yangi angur. Senotsü teyari agütsüba sentong ka nung sepaitemi lokti azüoktsü atema injang khatokba sülen electric wire ka nung kashia apokba ajanga nüburtem aoksatep aser iba ajanga lendong tulu ataloka liasü. Iba lendong nung nisung 85 asü aser nisung 322 dak tema yirua liasü.

Sanaa, Rongchii/April 20 (Agencies): Eid al-Fitr meshiba nguogo. Security staff benjung atongtsü anogo ka lia temi nüburtem nongina lokgi Yemen yimtiba Sanaa kübok azüoktsü meranga liasü. school ka nung nisung 85 Houthis-i lemsatepba tanga ajemsetogo, ta Houthi video ka nung azü melanger ketdangtsürtem aser media aliba tsüngsem aser asürtem sangdong balala ajanga indang süoshi ali nung prokshir metetdaksü. aliba sayuogo. Sanaa kübok Bab al-Yemen Tenük kuli agütsür Abdel-district nung school ka nung Rahman Ahmed aser Yahia Ramadan amungba Mohsen nati Associated Press tatembangbuba anogo news agency dang ashiba agi, shishilembar anati tenla USD 10 Houthis telungpurtemi lokti shi nisung shia nem agütsüba azüoktsü atema anüng nung agizüktsü atema Bodhbar injang khatok aser iba mapang aonung menor iba sentong electrical wire ka nung khashia ayongzüka agiba mapang apokba ajanga nüburtem lendong ya ataloka liasü. aoksatepa liasü. Telegram messaging app Ajsüüaka iba lendong nung Houthi television-i atalokba inang kuli tejangja lemsatepba video ka nung osang agütsüba mapang tashi nüburtem aika nongtepba, kar nung mejangjai liasü. asatepba aser kari parnok (Maneni tapak 8 nung...)

Mkg. nung school tanurtem Badminton tetoktepba akar



Indoor Badminton Stadium Mokokchung April 20 nü Mokokchung District Badminton Association-I (MDBA) ayongzüka akaba 4 Buba Inter-School Badminton Championship 2023 sentong Alakteta jaoker Mokokchung Town Lanur Telungjem Tir, Wb.Imnaonen Pongen-i tenzüksüdüng aser tanurtemi tenangzüka agidang tangokba noksa.

Mokokchung, Rongchii/ April 20(TYO) : Indoor Badminton Stadium Mokokchung nung tanu April 20 nü nungi tenzüka Mokokchung District Badminton Association-i (MDBA) 4 Buba Inter-School

Badminton Championship 2023 asayadagi. Tanu iba sentong Wb.Imnaonen Pongen Tir,Mokokchung Town Lanur Telungjem Alakteta jaoker ka süa tenzüksüdüng.

Iba tetoktepba asayamung ya April 20 nü tashi asayatsü. 4 Buba Inter-School Badminton Championship 2023 Mokokchung aser temeket aliba school 14 nungi asayar tebur 96 aser tetsür 41-i shilem agidar.

G. Rio Memorial U-19 (boys) Inter-district tournament osang

Dimapur, Rongchii/April 20 (TYO): 3buba Late G. Rio Memorial U-19 (boys) Inter-district tournament final April 22 nü Chümoukedima aser Niuland na asayatsü.

District anaprongli asayamung tepeyong kanga junga asayaogo aser tenapnogra league asayatem tembangba sülen asaya 4 nung khen danga tamakok mongui pei tata telok nung temaba jenjang nung tembangogo.

Ibuba semifinal asaya Niuland aser Mokokchung na Nagaland Cricket Stadium nung asaya aser Niuland team-i over 36.5 nung run 145 yanglu, ajisüaka Mokokchung team-i over 41.5 nung run 80 dang yangluteta asaya run 65 agi mekoki liasü.

Niuland atema Vishal Sahani-i ball 55 nung run 49 aser Md Shahin-i ball 78 nung run 46 yanglua liasü. Mokokchung team nungi bowler tem rongnungi Basant-i over 8 nung wicket 3 agi.

Run arishiba mapang Mokokchung team nungi Salangdangba (21) aser Imnawapang Walling (16) nati dang tera junga asaya liasü. Jatin shiba nem man of the match naroküm agütsü pai over 10 nung

wicket pongu agi aser AnilGupta-ia over 7 nung wicket 3 agia Niuland-i asaya run 65 agi akokba nung teyari agüja liasü.

Tanabuba semi-final ya Chumukedima aser Dimapur na tsüngda Sovima Cricket Ground nung asaya. Asaya nung Mughavi Sumi-i ball 64 nung run 75 aser Aloto Sumi-i run 29 yanglua Chümoukedima-i run 141 yangluba nung teyari agüja liasü. Dimapur team nungi bowler tem rongnungi Kavito Yeptho-i over 6.3 nung wicket 5 agi.

Run arishiba mapang Dimapur puri junga masayatet aser parnok rongnungi Anirudh Yadav-i run 29 yangluba dak alaker tanga batsmen temi junga masayateti liasü.

Chumu team atema Khrievitso Kense-i over 6.3 nung wicket 4 aser Aloto Sumi-ia over 5 nungi wicket 3 agia parnoki asaya akok aser Niuland den final asayatsü atema jenjang ngutetogo.

3buba edition Late G Rio Memorial U-19 (boys) Inter-district asayamung final ya April 22 nü Nagaland Cricket Stadium, Sovima nung Chümoukedima aser Niuland na asayatsü.

Bilawal Bhutto-i India nung SCO senden...

(Tapak 7 nungi...)

Iba senden nung shilem agiba ajanga SCO Charter aser inyakyim atema Pakistan bendanga agütsür aliba sayur aser Pakistan-i iba tesem aser foreign policy agizükba sayur," ta Mumtaz-i ashi.

Kasa mapang nung küm 12 tsüngda Pakistan nunger foreign minister tem rongnung Bilawal-i tang mezüngbuba India semdangtsü. Taoba mapang foreign minister Hina Rabbani Khar-i India semdanga liasü. Lenirtemi India semdangba

ajanga tesendaktep tajungba akümtsü akok. 2019 küm kiralongrartemi Pulwama amakba aser meyiper India-i Balakot amakba aser Jammu and Kashmir nungi Article 370 aginba sülen India aser Pakistan na tesendaktep tamajungba aküm.

India-i Pakistan aser China densema SCO züngsem ajak foreign ministers' senden atema jaokogo. Chinese foreign minister Qin Gang aser Russia foreign minister Sergey Lavrov nata iba

senden nung adentsü imlar.

India-i iba lokti tentet mendenbuba shilem 2022 küm agizüka liasü. SCO senden tatembangbuba ya Samarkand, Uzbekistan nung mena liasü.

SCO nung Russia, India, China, Pakistan, Kazakhstan, Kyrgyzstan, Tajikistan, aser Uzbekistan densema lir. India aser Pakistan na 2017 küm permanent züngsem aküm. züngsem ajak rongnung Iran tasenba lir aser parnok iba ita SCO nung adentsü.

Yemen nung Ramadan charity...

(Tapak 7 nungi...)

Houthi-i azüoka aliba Ministry of Interior otongdar Brig Abdel-Khaleq al-Aghri-i, iba tatalokba ya tesasatsüka ta ashiba den local ketdangsurtem den kecha tongtepratep mesüi teyari agütsüba sentong ayongzüka agiba dak tai tongloktsüügo.

Shishilembar ana shirnoki iba sentong ayongzüka liasü, tena sota yua lir aser bushisüngdang tenzükögo, ta ministry-i ashi. Houthis-i ashiba agi, lendong nung asür kinungertem nem parnoki teyari USD 2,000 agütsütsü aser yirur alirtem nem USD 400 agütsütsü.

Sanaa nung al-Thowra Hospital deputy director Hamdan Bagheri-i ashiba agi, lendong nung yirur parnok 73 mozükidangi anir aruogo aser yirur alir kinungertem parnok bushia mozükidangi aritepa adenshia liasü.

Al Jazeera osangbener Mohammed al-Attab-i Sanaa nungi ashiba agi, iba lendong atalokba ajanga linük ajunga nung nüburtem kanga mepelateper.

Sanaa ya 2014 küm nungi Houthis puri amokbanger lir. Iba küm parnoki alima kintemi agizükter aliba sorkar atsüngtoka liasü.

Telungpurtemi sorkar atsüngba sülen Saudi-i aniba telok kati parnok atsüngtoktsü atema sorkar nem teyari agüja arudar. Iba mangatettep nung sepaitem aser nüburtem 150,000 dak tema tepsetogo aser alima nung humanitarian disasters tamajungtiba ka tenzükdakja liasü.

Yemen nung nisung million 21 dak tema teyari aser tekümüzüka nüngdaker, ta United Nations Office for the Coordination of Humanitarian

Affairs-i metetdaksü.

Ajisüaka tawa telok ana tsüngda tangatettep ka dangi arudar aser taoba hopta tepuokertem aika melentepogo aser ano Eid al-Fitr benjung sülen tepuokertem aika melenteptsü imlar.

Nüburtem aser alima kin balalai Yemen nung rara ya Iran aser Saudi na tsüngda proxy rara ka ta shia arudar.

Tawa Saudi aser Iran na tesendaktep yanglushitsü atema tenangzüktepba yangluogo aser iba ajanga Yemen nunga tensa tajungba küma aotsü atema lenmang sadema lapoktsütsü imlar.

Iran aser Saudi nati tongtibang office tem lapokshitsü, linük ana tsüngda tayimtsü senzüsenpong tenzüksütsü aser lenirtemi kati ka semdangteptsü atema mulungtepogo.

Nadal Madrid Open nunga shilem magitettsü



Rongchii/April 20, 2023 (Agencies): January ita Australian Open asayaba mapang yiruba tang tashi tajungba makümba sülen Rafael Nadal taruba hopta asayatsü aliba Madrid Open nung shilem magitettsü, ta Grand Slam 22 tashi koker aliba asayar yagi Brehostibarnü metetdaksü.

Nadal Indian Wells, Miami aser Monte Carlo nunga masayatet aser tang asaya aliba Barcelona Open nunga masayatet, kechiyong pa Melbourne Park nung tanabuba round Mackenzie McDonald den asayaba mapang yiruba sülen tang tashi taneptsü junga monguteti lir.

"Mezüngbo taneptsü angutsü atema hopta trok nungi ti tsüngda agitsü ta bilem ajisüaka hopta 14 jungogo," ta Nadal-i ashi.

"Onoki imlaba ama masü. Medical tsütsü nungi tetuyuba agütsüba ajak sülen anidakogo, saka panoki onok dang mezüng ashiba ama taneptsü mangur aser

iba ajanga tetsükdaksü adoker. "Hoptatem süia aoer aser kü indang career nung Monte Carlo, Barcelona, Madrid, Rome, Roland Garros amala tongibang asayamungtem nung asayaner, saka ni Monte Carlo aser Barcelona nung masayatet aser tang tia maka Madrid nunga masayatettsü," ta Nadal-i ashi.

Spain nunger asayar yagi French Open 14 ben koka lir aser clay court nung asaya pai amokbanger asaya aruogo aser pa May ita asayatsü aliba French Open nungbo asayatettsü ta tamang akar.

"Yiruba taneptsü junga monguteti lir aser ni tokteptsü atema training magiteteter," ta Nadal-i ashi.

"Ni training agia liasü saka anogo ishika tejakdang onoki lenmang melenshia tanga treatment ka agitsü asoshi telemtetba agiogo.

"Ni deadline magütsütettsü kechiyong ni meteta ali asübo shila," ta paisa shisem.

BILEMDANGANG
"Merangdanger tamakok anguba nung kecha maksü mali."